

## ՀՈԳԵՀԱՆ

(Լեգենդա)

Փոցխովի ձորում ծաղկում էր Շամոն,  
 Կուսական գարուն ու սեր շընչելով,  
 Փոցխովի ձորում թռչնում էր Համոն,  
 Ծաղիկ աղջրկա սիրուց տանջվելով:

5 — Չէ՛, չեմ հավատում իսկի քո սերին,  
 Դու սուտ ես ասում, դու չես սիրում ինձ...  
 Ասում էր Շամոն սիրահար տղին  
 Ու հեռո՛ւ-հեռու հըրում իրանից:

Ու դարձյալ գընաց տըղան սիրակեզ.  
 10 Ո՞ր կըրակն ընկնեմ, Շամո, որ գըթաս.  
 Սիրտս չեմ կարող, թե հանեմ տեսնես —  
 Ինչ անեմ ուրիշ, որ ինձ հավատաս:

— Տեսնո՞ւմ ես, ահա, ասավ աղջիկը,  
 Ցույց տալով լերան գագաթը ահեղ.  
 15 Ինձ դիր քո ուսին, սըրինգըդ փըշիր,  
 Ու վե՛ր, պարելով տար մինչև այնտեղ:

Երբ որ կըհասնենք էն սարի գըլխին,  
Այնժամ կիմանամ, որ սիրում ես ինձ,  
Այնտեղ կըլինեմ ես քո սիրուհին,  
20 Ու սիրով կապված կիջնենք այնտեղից:

Ու դըրավ ուսին սիրած աղջըկան,  
Սրինգը հընչեց, ըսկըսեց պարը,  
Ճանապարհ ընկավ սիրահար տըղան  
Դեպի ամպամած լեռան կատարը:

25 Գընում է, գընո՛ւմ սեպ ժայռերն ի վեր,  
Ու պար է գալի, և անվերջ ածում.  
— Դեռ շա՛տ է հեռու... որտե՛ղ ես դու դեռ...  
Դու ինձ չես սիրում, դու սուտ ես ասում...

Ծալվում են հոգնած ծընկները տակին,  
30 Քըրտինքը վազում ճակատից ներքև,  
Բերանն է հասել — թըռչում է հոգին,  
Աչքերը մթնում, շընչում հևիհև:

— Չէ՛, չեմ հավատում ես դեռ քո սերին,  
Դեռ շա՛տ է հեռու գագաթը լեռան...—

35 Ասում է Շամոն նըստած ուսերին,  
Ճըգնում է նորից ուժասպառ տըղան:

Արդեն ամպերի տակին է պարում:  
Մոտիկ է արդեն գագաթը ձյունոտ,  
Վերջին ուժերը հավաքում, լարում,

40 Դարձյալ մի պըտույտ, դարձյալ մի ոլորտ...

Մի քիչ էլ... քիչ էլ... վերջապես հասավ,  
Վայր դըրավ ուսից սարի կատարին.  
— Հոգիս հանեցիր, օ՛Ֆ, Շամո... — ասավ,  
Ասավ ու ընկավ սըրինգը ձեռին:

45 — Այժմ քո սերին հավատում եմ ես,  
Այս ժամից ահա քոնն եմ հավիտյան,  
Ճըշաց աղջիկը, գըրկեց վերջապես,  
Գըրկեց Համոյի... դիակն անկենդան:

Այժըմ էլ ժեռուտ սարի գագաթին  
50 Դեռ ցույց են տալի մի հին գերեզման,  
Պատմում, ափսոսում անբախտ իգիթին,  
Ու սարի անունն ասում Հոգեհան...